

每週經課朗誦經文 (巴克禮漢羅/教羅) 2011/12/25

共同經課-1 以賽亞書五十二章七節 ~ 十節

7報好消息，傳和平，報福氣 ê 好消息，傳救恩 ê，對錫安講，你 ê 上帝做王 lah，Chit 人 ê 腳上山頂，到 chiah súi！ 8 聽 ah，你守望 ê 人 ê 聲！ in 出大聲，相 kap 唱歌；因為耶和華 tò 來錫安 ê 時，in beh 當頭對面看見。 9 耶路撒冷拋荒 ê 所在 ah，tiòh 出歡喜 ê 聲，相 kap 唱歌；因為耶和華安慰祂 ê 百姓，救贖耶路撒冷。 10 耶和華 tī 萬國 ê 目矚前 lùt 伊 ê 聖手；地極 ê 人 lóng 看見咱 ê 上帝 ê 拯救。

共同經課-2 詩篇九十八篇

1 Lín tiòh òng 耶和華唱新 ê 歌；因為伊 bat 行奇妙 ê 事；伊 ê chiàⁿ 手，kap 伊聖 ê 手骨，已經為家已行拯救。 2 耶和華 hō 人知伊 ê 拯救；Tī 列邦人 ê 目矚前顯明伊 ê 公義。 3 伊記念伊 tùi 以色列家所發出 ê 慈愛 kap 信實；地 ê 四角 lóng 看見咱 ê 上帝 ê 拯救。 4 全地 lóng tiòh òng 耶和華出歡喜 ê 聲；Tiòh 出大聲歡喜唱歌 o-ló 伊。 5 Tiòh 彈琴唱歌 o-ló 耶和華；Tiòh 彈琴河詩歌 ê 聲 o-ló 伊。 6 用號頭 kap 哨角 ê 聲，Tī 君王耶和華 ê 面前出歡喜 ê 聲。 7 願海，kap 其中所充滿 ê，lóng tiòh 出大聲；世界，kap tiàm tī hit 中間 ê，亦 tiòh 出聲； 8 願大水 phah 手掌，願 chiah-ê 山 tī 耶和華 ê 面前出歡喜 ê 聲。 9 因為伊來 beh 審判全地；伊 beh 照公義審判世界，照伊 ê 正直審判列邦。

共同經課-3 希伯來書一章一節 ~ 四節，五節 ~ 十二節

1 上帝 tī 在早已經託 hiah-ê 先知，用 choē-choē 段，choē-choē 方法，kā 列祖講； 2 taⁿ tī hiah-ê 日 ê 路尾，託伊 ê Kiáⁿ kā 咱講；就是伊所設立做承接萬物 ê 後嗣，亦 bat tùi 伊來創造 chiah-ê 世界。 3 伊是上帝 ê 榮耀所發出 ê 光，是上帝本質 ê 真象，伊用伊權能 ê 話 teh 扶載萬物，已經成清潔罪 ê 事，就坐 tī 極高 ê 天頂，大威嚴 ê 大 pêng； 4 成做比 chiah-ê 天使 khah 大，合 tī 伊所承接 ê 名，比 in khah 尊貴。 5 因為上帝 kiám bat tùi 甚麼天使講：你就是我 ê Kiáⁿ，我今 á 日生你？koh 講，我 beh 做伊 ê 父，伊 beh 做我 ê Kiáⁿ。 6 到伊 koh choā 大 Kiáⁿ 入世間 ê 時，就講，上帝 chiah-ê 天使 lóng tiòh 拜伊。 7 論到天使就講：Hō伊 ê 天使做風，伊 ê 差用做火燄； 8 但是論到 Kiáⁿ 就講，上帝 ah，你 ê 座位代代 tī-teh，你 ê 國權柄是正直 ê 權柄。 9 你 ài 公義，怨恨不法；所以上帝，你 ê 上帝，用歡喜 ê 油抹你，贏過你 chiah-ê 同伴。 10 Koh 講，主 ah，起頭 ê 時，你 hē 地 ê 地基，Chiah-ê 天亦是你 ê 手所造 ê； 11 In beh 滅無；獨獨你久長 tī-teh；In lóng beh 親像衣服漸漸舊； 12 你 beh 將 in 捲起來，親像外衫，親像衣服，in 就 beh 變換；獨獨你原在是 án-ni，你 ê 歲壽無窮盡。

共同經課-4 約翰福音一章一節 ~ 十四

1 Tī 起頭有道，道 kap 上帝 saⁿ-kap tī-teh，道就是上帝。 2 Chit-ê 道 tī 起頭 kap 上帝 saⁿ-kap tī-teh。 3 萬物 tùi 道來創造；見若受創造 ê，無一項 m̄ 是對伊來創造。 4 活命 tī 伊 ê 內面；chit-ê 活命是人 ê 光。 5 光照 tī 烏暗；烏暗無接納伊。 6 有一人 tùi 上帝差來，名叫約翰。 7 Chit-ê 人來做干證，是 beh 為 tiòh 光做干證，hō 眾人對伊來信。 8 伊 m̄ 是 hit-ê 光，是 beh 為 tiòh 光做干證 nā-tiāⁿ。 9 有真 ê 光來入世間，teh 照萬人。 10 伊 tī 世間，世間對伊來創造，也世間 m̄-bat 伊。 11 伊到家已 ê 所在，也家已 ê 人 m̄ 接納伊。 12 見若接納伊 ê，就是信伊 ê 名 ê 人，伊就賞賜 in 有權，成做上帝 ê kiáⁿ 兒； 13 in m̄ 是 tùi 血氣，亦 m̄ 是 tùi 肉體 ê 意思，亦 m̄ 是 tùi 人 ê 意思生 ê，就是 tùi 上帝。 14 道成肉體，khia 起 tī 咱中間，有恩典 kap 真理滿滿；koh 阮 bat 看見伊 ê 榮光，親像獨生 ê kiáⁿ tùi 父所得 ê 榮光。